

Inatsisartut suleriaasianni § 36, imm. 1 malillugu Naalackersuisunut apeqqutit matumuuna saqqummiunneqarput:

**Qilalukkanik piniapilunneq pillugu Naalackersuisumut apeqqut:**

Inatsisartuni ilaasortat Palle Christiansen aamma Jens B. Frederiksen, Demokraatit

Ilumoorpa, "Qilalukkat qaqqortat qernertallu illersugaanerat piniagaanerallu pillugu Namminersornerullutik Oqartussat nalunaarutaanni nr. 2, 12. februar 2004-meersoq" taakkunanga uumasunik piniapilunneq ajornartoq?

Ilumoorpa, Uummannami 20. november ullup ataatsip ingerlanerani qilalukkanik 68-inik pisaqartoqarsimanera, taamaalilluni qilalukkat pisassarititat 51-inik sinnerneqarsimasut?

Ilumoorpa, piniapilunnermi qilalukkat 51-it unioqqutitsilluni pisat ukiup tulliani pisassarititassanut ilanngaataajumaartut?

Piniapilunneq qanoq ililluni pisinnaava, "Qilalukkat qaqqortat qernertallu illersugaanerat piniagaanerallu pillugu Namminersornerullutik Oqartussat nalunaarutaanni nr. 2, 12. februar 2004-meersoq" nalunaarutip ajornarsisippagu?

AG normu 98-imi Jens Lars Fleischer issuarneqarpoq, Namminersornerullutik Oqartussat nalunaarutaanik assigiinngitsunik nassuiaasoqarsinnaasoq. Naalackersuisoq Jens Lars Fleischerimik isumaqataava, nalunaarutit assigiinngitsunik nassuiarneqarsinnaaneri ilumoorpa?

Uummannami piniarpilunnermi pisut uteqqinnissaat piniveersaarniarlugit Naalackersuisoq qanoq iliuuseqarniarpa?

Pissutigalugu:

Qilalukkanik 51-nik pisaqapilunneq pisarititassanik annertuumik sinniineruvoq. Sinniineq "Qilalukkat qaqqortat qernertallu illersugaanerat piniagaanerallu pillugu Namminersornerullutik Oqartussat nalunaarutaanni nr. 2, 12. februar 2004-meersoq" nalunaarut malillugu pisinnaangilluinnarpoq. Taamaattumik soqutiginarpoq paasissallugu Naalackersuisoq qanoq iliuuseqarniarnersoq, tamanna paasinarsippat ajornaquteqanngitsumik pisinnaasoq. Aammattaaq oqartoqarsimavoq nalunaarut assigiinngitsunik nassuiarneqarsinnaaneranut ajornaquteqanngitsoq, soqutiginassagalarporlu paasissallugu Naalackersuisoq tamatumunnga isumaqataanersoq.

Inatsisartut ukiuunerani ataatsimiinnissaat eqqarsaatigalugu, apeqqutit qulaani allaqqasut akineqarnissat ataani Inatsisartuni Ilaasortat atsiortut kingusinnerpaamik 3. januar 2006 perusukkalarpaat.

Inussiarnersumik inuulluarit

Inatsisartuni Ilaasortat Palle Christiansen aamma Jens B. Frederiksen